

Datum: 13.1.2021.

Broj: 02-06-827

TI BiH pozdravlja usvajanje novog Zakona o sukobu interesa: Apel Domu naroda da podrži unapređenje

Banja Luka, 13. januar 2021. - Novi Zakon o sukobu interesa u institucijama Bosne i Hercegovine koji je usvojen u Predstavničkom domu PS BiH predstavlja korak naprijed u odnosu na postojeće zakonsko rješenje, jer propisuje jasnije zabrane za obavljanje višestrukih funkcija, kao i za ostvarenje dobiti i finansijskog interesa od privatnih preduzeća koja posluju sa državom.

Ukoliko novi zakon u ovom obliku potvrdi i Dom naroda PS BiH brojni izabrani zvaničnici sa državnog nivoa moraće se odreći duplih funkcija, a iste standarde trebalo bi da uspostave i niži novi vlasti. Podaci koje je nedavno objavio Transparency International u BiH (TI BiH) pokazuju da čak 61 funkcioner na nivou BiH, entiteta i kantona obavlja više od jedne funkcije. TI BiH je od početka učestvovao u izradi ovog zakona i inicirao njegovo usvajanje, te iako je u parlamentarnoj proceduri pretrpio određene izmjene, i dalje zadovoljava osnovne međunarodne standarde i uslove koje je pred BiH postavila Evropska komisija.

Ovakva verzija zakona predstavlja ogroman napredak i u odnosu na nedavnu verziju koju je predložilo Ministarstvo pravde BiH, a koja omogućava da funkcioneri budu vlasnici ili direktori privatnih preduzeća koja dobijaju tendere ili da budu na čelu udruženja koja se finansiraju iz budžeta ako novac i tenderi dolaze sa nižih nivoa vlasti.

Takođe ogroman napredak predstavlja i član zakona koji zabranjuje funkcionerima da koriste javne funkcije ili javne resurse za političku promociju. Podsjećamo da je TI BiH tokom monitoringa izborne kampanje zabilježio preko 2500 primjera zloupotrebe javnih resursa i funkcija za promociju političkih stranaka i kandidata, pa bi usvajanje ovakvog zakona bio ogroman napredak u omogućavanju fer i poštenih izbora.

Svakako jedno od najznačajnijih unapređenja predstavlja uvođenje kontrole nad imovinskim kartonima nosilaca javnih funkcija, koja do sada nije postojala. Važno je istaći da bi ovaj zakon trebalo da provodi nezavisna komisija, umjesto dosadašnje komisije u kojoj su sjedili izabrani parlamentarci i sami odlučivali o vlastitoj odgovornosti i sukobu interesa svojih stranačkih kolega.

Unapređenje zakona o sukobu interesa jedan je od 14 ključnih prioriteta koje je EU postavila pred BiH, ali se rješavanje ovog pitanja godinama blokira jer se brojni donosioci odluka i sami nalaze u sukobu interesa. Upravo zbog toga, TI BiH apeluje na Dom naroda PSBIH da takođe usvoji ovaj zakon i konačno pokaže spremnost za unapređenje antikorupcijskih zakona, a ključna će biti podrška delegata HDZ i SNSD, koji nisu podržali ovaj zakon u Predstavničkom domu. Stoga je ključna i jasna poruka od strane EU i insistiranje na usvajanju kvalitetnog zakonskog rješenja, a ne samo kozmetičkih promjena.

Udruženje za borbu protiv korupcije Transparency International u BiH
Reg. No. UP08-07-1-616/11, Ministarstvo pravde BiH, Sarajevo

Sjedište: Gajeva 2, 78000 Banja Luka, Tel/Fax +387 51 216 369, 216 928, 224 521, 224 520
Poslovnica: Mula Mustafe Bašeskije 9/1, 71000 Sarajevo, Tel +387 33 220 049, Fax +387 33 220 047
E-mail: info@ti-bih.org
Web: www.ti-bih.org